

D^a ROSA-ANA PRADA QUEIPO SECRETARIA DO CONCELLO DE AMES NA PROVINCIA DA CORUÑA

CERTIFICO: QUE O PLENO DESTE CONCELLO LEVOU A CABO SESIÓN ORDINARIA O DÍA 25 DE FEBREIRO DE 2010. DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE

ACTA DA SESIÓN ORDINARIA LEVADA A CABO POLO PLENO DO CONCELLO O DÍA 25 DE FEBREIRO DE 2010.-

No Salón de Sesiós da Casa do Concello de Ames, ás vinte horas e trinta minutos (20.30) do xoves día 25 de febreiro de 2010, reúnese o Pleno do Concello en sesión ordinaria de primeira convocatoria, baixo a presidencia do Sr. alcalde don **Carlos Antonio Fernández Castro**, e coa asistencia das/os señoras/es concelleiras/os seguintes:

Grupo municipal socialista	Grupo municipal Popular	Grupo municipal do BNG
Patricia Conde Lois M ^a Isabel González Cancela José Manuel Miñones Conde Gustavo Nieto Santiago Úrsula Seijas Seoane José Varela Abeledo Francisco Villaverde Marcos	Santiago V. Amor Barreiro M ^a Dolores Fernández Álvarez Ramón García Argibay Emilio Martínez Carballeira Bernardo Moar Míguez José Pérez Bello Alfonso Rey López	Olalla Alvite del Río Xosé M. Fernández López David Santomil Mosquera Vitor Vicente Díaz Mercedes Vidal Baamonde

Non asiste o concelleiro do grupo municipal socialista don **Santos Lorenzo Lorenzo**.

Asisten a señora **interventora** dona María del Carmen Castro Louzao e o señor **tesoureiro** don Santiago González Prado.

Actúa como **secretaria** a titular da Corporación Rosa-Ana Prada Queipo.

O señor alcalde don **Carlos Antonio Fernández Castro** saúda a todas/os as/os presentes e da comezo a sesión ordinaria do Pleno municipal correspondente ó día 25 de febreiro de 2010.

A) PARA DAR CONTA:

Punto Primeiro.- Dar conta dos decretos ditados pola Alcaldía dende a última sesión plenaria ordinaria.

O señor alcalde informa á Corporación que os decretos ditados pola Alcaldía dende a última sesión plenaria ordinaria estiveron a disposición de todas/os as/os concelleiras/os na Secretaría Xeral, engadindo que o acceso aos decretos é libre para todas/os as/os concelleiras/os en calquera momento na Secretaría Xeral do Concello, e que con ocasión da convocatoria dos plenos ordinarios o que teñen a súa disposición é o libro oficial, en papel timbrado e numerado, ademais dos duplicados existentes nos distintos departamentos do Concello.

Di o señor alcalde que se da conta de 103 decretos, comprendidos dende o número 49 ao número 152, máis os que quedaron pendentes da anterior sesión plenaria ordinaria.

Punto Segundo.- Dación de conta da resolución do contrato de realización do inventario de bens e dereitos do concello de Ames, por mutuo acordo.

Toma a palabra o señor alcalde don **Carlos Antonio Fernández Castro** para dicir que se informa ao pleno da corporación do escrito que a empresa Tribugest Gestión, de Tributos, S.A. presentou o día 10 de febreiro de 2010 solicitando a devolución da

garantía definitiva que constituíra no seu día para responder da correcta execución do contrato formalizado o día 9 de decembro de 2004 co concello pola realización do inventario de bens e dereitos. Expón o señor alcalde que, considerando que a realización dos traballos resultou mais difícil do que inicialmente podería supoñerse, que os documentos elaborados pola empresa non se axustaban completa e perfectamente as expectativas e necesidades, que a adxudicataria anulou as facturas que presentara, e manifestou a súa intención de non reclamar nin o abono de facturas nin indemnización de ningún outro tipo e considerando conveniente establecer dun xeito máis definido o obxecto da prestación, e tendo en conta que o artigo 111, do texto refundido da Lei de contratos das Administracións Públicas, establece como causa de resolución dos contratos o mutuo acordo entre a Administración e o contratista, a Xunta de Goberno Local acordou resolver de mutuo acordo o contrato suscrito e proceder á devolución do aval bancario presentado pola adxudicataria como garantía definitiva ao non existir prexuízos para este Concello.

Di o señor alcalde que se da conta ao pleno deste acordo toda vez que a proposta de inventario municipal presentada pola empresa obtivera aprobación inicial do pleno.

Intervén co permiso da presidencia o voceiro do grupo municipal do BNG don **Xosé Manuel Fernández López** para expoñer substancialmente que na medida en que este asunto é moi antigo o seu grupo municipal se considera na obriga de dar a súa opinión. A continuación saúda a todos os presentes solidarizándose expresamente cos traballadores de Limpiezas Ames, presentes no público portando pancartas.

Respecto do punto expresa que lle sorprende esta rescisión tras seis anos e lle parece un fracaso por ambas partes, empresa e concello, profesional no primeiro caso e de responsabilidade política no segundo, sendo a consecuencia que na actualidade non hai un inventario fiable. Indica que recentemente solicitou acceso ao inventario do Patrimonio Municipal de Solo, cuxa constitución foi aprobada en pleno hai case tres anos, e se lle dixo que non existía.

Toma a palabra o señor alcalde don **Carlos Antonio Fernández Castro** que di que a resolución do contrato obedece á non posibilidade de ter sido levado a cabo en toda a súa extensión, sendo precisamente o Patrimonio Municipal de Solo un dos atrancos atopados, e que das dúas vías posibles de resolución, a xudicial e o mutuo acordo se considerou a última a mellor, abrindo ademais así a porta a ter un novo inventario de bens actualizado que inclúa o Patrimonio Municipal de Solo, prevéndose que estará rematado antes do fin desta lexislatura.

Da conta tamén o señor alcalde da recepción ese mesmo día dun manuscrito que don XXXXXX lle remitíu, onde agradece ao alcalde e aos concelleiros a solidariedade para con el e a súa familia respecto dos actos vandálicos dos que foi vítima a súa casa, escrito ao que da lectura.

B) PARA DELIBERACIÓN E ACORDO:

Punto Terceiro.- Aprobación, se procede, de actas anteriores.

Informa o señor alcalde que a acta que se presenta a consideración é a correspondente á sesión ordinaria do día 28 de xaneiro de 2010, e tras preguntar se hai intervencións respecto da mesma e non realizando ningunha consideración ningún membro da corporación, di o señor alcalde que a acta queda aprobada. Seguidamente e ante a demanda de aclaración por parte de varios concelleiros respecto do porqué de non votar a acta, responde o señor alcalde que a Alcaldía solicitou un ditame dunha experta en dereito administrativo como consecuencia dalgunha votación ás actas nos últimos plenos, e se lle manifestou que as actas non se votan senón que se someten a consideración da corporación en tanto que son a redacción do acontecido nunha sesión, e que se non hai ningunha intervención

persoal e directa de ningún membro da corporación quedan aprobadas. Non obstante, dada esta novidade que obedece á información recibida e para evitar problemas non ten inconveniente en aplicala en vindeiros plenos e proceder neste como viña sendo, facendo o posible porque o ditame de expertos en dereito administrativo sexa trasladado por escrito á corporación antes do vindeiro pleno.

Intervén co permiso da presidencia o voceiro do grupo municipal popular don **Santiago Amor Barreiro** para preguntar se todo o feito anteriormente en canto á aprobación das actas plenarias foi ilegal, ao que o señor **alcalde** responde que segundo o criterio do ditame mencionado o que non se pode facer é votar en contra do que se dixo, intervindo de novo o señor **Amor Barreiro** para dicir que si se pode votar en contra de como está recollido, respondéndolle o señor **alcalde** que pedirá o ditame detallado e por escrito para ter oportunidade de debatelo e tomar a decisión pertinente en próximos plenos.

Intervén co permiso da presidencia o voceiro do grupo municipal do BNG don **Xosé Manuel Fernández López** para interesarse polas certificacións tras os acordos, e o señor alcalde responde que figuran na acta como foron acordados, e que nesta ocasión se votará a acta como se viña facendo.

Sometida a votación a acta correspondente á sesión plenaria do día 28 de xaneiro de 2010, a mesma é aprobada por maioría absoluta cos 13 votos a favor dos grupos municipais socialista e do BNG (8 votos dos membros presentes do grupo municipal socialista e 5 votos dos membros do grupo municipal do BNG) e os 7 votos en contra dos membros do grupo municipal popular.

C) PARA CONTROL DO GOBERNO:

Punto Cuarto.- Resolución de alegacións e aprobación definitiva da Ordenanza Reguladora das tarxetas de estacionamento e accesibilidade do concello de Ames.

O señor alcalde don **Carlos Antonio Fernández Castro** outorga a palabra á concelleira delegada de Benestar Social e Igualdade dona **Isabel González Cancela**, que introduce este punto dicindo substancialmente que o asunto foi aprobado inicialmente na sesión do 24 de setembro de 2009 e que no período de exposición pública o BNG presentou alegacións, as cales foron revisadas pola súa concellaría e o departamento de secretaría ademais de sometelas ao ditame da Consellería de Traballo da Xunta de Galicia, a cal contestou a principios de febreiro de 2010 aceptando as alegacións.

O señor alcalde don **Carlos Antonio Fernández Castro** abre unha primeira quenda de intervencións outorgando a palabra á concelleira do grupo municipal do BNG dona **Mercedes Vidal Baamonde**, que di substancialmente que como quedou manifestado no pleno do 24 de setembro de 2009 o BNG xa amosara dende maio de 2008 o interese en traballar nesta ordenanza, comprometéndose na sesión de setembro a presentar as alegacións para adaptala á lexislación vixente e mellorar algúns aspectos enumerando os cambios propostos nas alegacións e que a Comisión Técnica de Accesibilidade da Xunta de Galicia informara favorablemente. Propón tras un novo repaso, ao pleno, as seguintes cuestións: no artigo 3 no apartado de solicitudes ao final dos requisitos para acceder á tarxeta de estacionamento propón incluír informe de dificultade emitido polos EVOS, xa que é un dos requisitos que de xeito explícito se precisan no punto 2.1, e así mesmo incluír esta mesma frase no recadro do anexo I. Di tamén que habería que unificar o xénero nalgúns palabras e propón que nas follas que non teñen encabezamento como é a de notificación do señor alcalde da concesión ou denegación se explicita o que é, e na folla onde os traballadores sociais informan da concesión ou denegación, que eles no seu informe indiquen por que se

concede ou non. Remata dicindo que solicita que o texto se pase por Normalización Lingüística.

Intervén o concelleiro do grupo municipal popular don **Bernardo Moar Míguez**, que primeiramente manifesta a solidariedade do grupo municipal popular cos traballadores de Limpiezas Ames e a continuación di substancialmente que lle parece moi importante que o concello de Ames conte con esta ordenanza, que o seu grupo non ten inconveniente en canto ás modificacións propostas polo BNG, entendendo que axuda moito que o ámbito se ampliase a toda a Unión Europea, anunciando o voto afirmativo.

O señor alcalde don **Carlos Antonio Fernández Castro** outorga a palabra á concelleira delegada de Benestar Social e Igualdade dona **Isabel González Cancela**, que referíndose ás modificacións propostas pola señora Vidal afirma non ter ningún inconveniente.

Rematadas as intervencións o pleno da corporación por unanimidade adopta os seguintes acordos:

Primeiro.- Estimar as alegacións presentadas polo grupo municipal do BNG durante o trámite de exposición pública da aprobación inicial da ordenanza reguladora das tarxetas de estacionamento e accesibilidade do concello de Ames, mais as modificacións propostas *in voce* pola concelleira dona Mercedes Vidal Baamonde.

Segundo.- Prestar aprobación definitiva á ordenanza reguladora das tarxetas de estacionamento e accesibilidade do concello de Ames, cuxo texto figura como anexo I deste acordo.

Terceiro.- Publicar o texto íntegro da ordenanza que se aproba definitivamente no BOP aos efectos legalmente establecidos.

Cuarto.- Facultar ao señor alcalde presidente para cantas actuacións de trámite sexan precisas para a mellor efectividade do acordado.

ANEXO I

Ordenanza reguladora das tarxetas de estacionamento e accesibilidade do concello de Ames

Artigo 1. Obxecto.-

O obxecto da presente ordenanza reguladora é a adaptación de medidas que garantan o cumprimento do mandato no ámbito municipal, da expedición e utilización das tarxetas de estacionamento e accesibilidade, conforme recolle a Lei 8/1997, de 20 de agosto, de accesibilidade e supresión de barreiras na Comunidade Autónoma de Galicia nos seus art. 27 e seguintes e o Decreto 35/2000, do 28 de xaneiro, polo que se aproba o Regulamento de desenvolvemento e execución da lei anteriormente citada, nos art. 50, 51, 52 e 53, co fin de favorecer, no primeiro caso, o uso dos transportes privados por parte de persoas con graves dificultades de mobilidade para que así poidan gozar de facilidades de estacionamento e, no segundo caso, como documento acreditativo da situación de discapacidade para favorecer o uso de transportes públicos.

Artigo 2. Beneficiarios/as.-

1. Tarxeta de estacionamento

Poderán ser beneficiarias da tarxeta de estacionamento con carácter persoal e intransferible aquelas persoas con discapacidade, veciñas do Concello de Ames, que teñan recoñecida a dificultade para o uso dos transportes públicos polo Equipo de

Valoración e Orientación (EVO), dependentes das seccións de cualificación e valoración de discapacidades da Xunta de Galicia.

2. Tarxeta de accesibilidade

Terán dereito á expedición da tarxeta de accesibilidade aquelas persoas interesadas, veciñas do Concello de Ames ás que os equipos de valoración e orientación (EVO), dependentes das seccións de cualificación e valoración de discapacidades da Xunta de Galicia, lles expediran un certificado de discapacidade.

Así mesmo, terase en consideración o disposto na Lei, de ámbito estatal, 51/2003 de 2 de decembro, de igualdade de oportunidades, non discriminación e accesibilidade universal das persoas con discapacidade.

Artigo 3. Solicitudes.-

1. Tarxeta de estacionamento

- Modelo de instancia conforme ao anexo I da presente ordenanza.
- Fotocopia do DNI cotexada.
- Certificado de discapacidade.
- Dúas fotografías tamaño carné.
- Certificado de empadramento.
- Informe dos equipos de valoración e orientación (EVO) sobre a dificultade para o uso dos transportes públicos.

2. Tarxeta de accesibilidade

- Modelo de instancia conforme ao anexo II do da presente ordenanza.
- Fotocopia do DNI cotexada.
- Certificado de discapacidade.
- Dúas fotografías tamaño carné.
- Certificado de empadramento.

Artigo 4. Procedemento e trámite.-

1. Tarxeta de estacionamento

1º- O expediente iniciárase a instancia da persoa interesada no momento en que esta ou o/a seu/súa representante acheguen a documentación requirida no Rexistro Xeral do Concello.

2º- Á vista do certificado de discapacidade ou do informe preceptivo do EVO, os técnicos dos servizos sociais municipais emitirán un informe de valoración.

3º- Posteriormente, ditarase resolución de aprobación ou denegación por parte da Alcaldía e notificaráselle á persoa interesada, conforme ao procedemento establecido na Lei 30/92, de 26 de novembro, de réxime xurídico das administracións públicas e do procedemento administrativo común.

4º- A tarxeta de estacionamento para persoas con discapacidade terá unha validez de 10 anos, para as persoas con discapacidade permanente, e ata a data da revisión da discapacidade, cando esta sexa provisional.

5ª A renovación da tarxeta de estacionamento seguirá o mesmo procedemento que o da súa solicitude.

2. Tarxeta de accesibilidade

1º- O expediente iniciárase a instancia da persoa interesada no momento en que esta ou o/a seu/súa representante acheguen a documentación requirida no Rexistro Xeral do Concello.

2º- Cando o/a solicitante non dispoña de certificado de cualificación do grao de discapacidade igual ou superior ó 33%, o ente local remitiralle copia da solicitude ao EVO correspondente, para a realización do informe preceptivo e vinculante para a resolución do procedemento.

De acordo coa Lei 51/2003, do 2 de decembro, considéranse, ademais, afectados/as por unha discapacidade do 33%, os/as pensionistas da Seguridade Social que teñan recoñecida unha pensión de incapacidade total, absoluta ou gran invalidez, e os/as pensionistas de clases pasivas que teñan recoñecida unha pensión de xubilación ou de retiro por incapacidade permanente para o servizo ou inutilidade, materia exclusivamente desenvolvida a efectos fiscais ou laborais.

3º- Á vista do certificado de discapacidade ou do informe preceptivo e vinculante do EVO, os técnicos dos servizos sociais municipais emitirán unha valoración.

4º- Posteriormente ditarase resolución de aprobación ou denegación por parte da Alcaldía e notificaráselle á persoa interesada de acordo co procedemento establecido na Lei 30/92, de 26 de novembro, de réxime xurídico das administracións públicas e do procedemento administrativo común.

5º- A tarxeta de accesibilidade para persoas con discapacidade terá unha validez de 10 anos, para as persoas con discapacidade permanente, e ata a data da revisión da discapacidade, cando a discapacidade sexa provisional.

6ª A renovación da tarxeta de accesibilidade seguirá o mesmo procedemento que o da súa solicitude.

Artigo 5. Dereitos e utilización das tarxetas.-

1. Tarxeta de estacionamento

A titularidade da tarxeta de estacionamento dá dereito a:

- a) utilización das prazas de aparcadoiro reservadas para tal efecto no ámbito da Comunidade Autónoma
- b) autorización para que os vehículos ocupados por estas persoas poidan deterse na vía pública durante o tempo imprescindible e sempre que non entorpezan a circulación rodada ou peonil
- c) cando a titular da tarxeta sexa unha persoa física, poderá utilizala en calquera vehículo no que se traslade, sexa ou non da súa propiedade, e sexa o/a titular da tarxeta o/a condutor/a do vehículo ou non
- d) cando a titular da tarxeta sexa unha persoa xurídica, deberá incluír a matrícula ou matrículas dos vehículos habilitados para transportar as persoas con graves problemas de mobilidade

Cando se faga uso da tarxeta de estacionamento, esta colocarse na parte interior do parabrisas dianteiro de forma que resulte claramente visible dende o exterior.

O modelo axustarase ás características sinaladas no anexo III do regulamento aprobado mediante o Decreto 35/2000, de 28 de xaneiro.

A tarxeta terá validez no ámbito da Unión Europea, segundo o anexo III do regulamento aprobado mediante o Decreto 35/2000, de 28 de xaneiro.

2. Tarxeta de accesibilidade

A titularidade da tarxeta de accesibilidade dará dereito:

- a) á reserva de prazas nos transportes colectivos
- b) á bonificación nas tarifas para as persoas que dispoñan da tarxeta

- c) á reserva de prazas nos centros de servizo do transporte público

A aplicación desta tarxeta terá validez no ámbito da Unión Europea, segundo o anexo III do regulamento aprobado mediante o Decreto 35/2000, de 28 de xaneiro.

O modelo axustarase ás características sinaladas no anexo III do regulamento aprobado mediante o Decreto 35/2000 do 28 de xaneiro.

Artigo 6. Obrigas e réxime sancionador.-

En ambos os dous casos o/a beneficiario/a queda obrigado/a a comunicar o cambio de enderezo, cando sexa para outro municipio, para solicitar o traslado do expediente ao novo concello de residencia.

No suposto de que se detecte uso indebido da tarxeta de estacionamento de maneira reiterada e debidamente probada, con independencia da sanción pecuniaria que puidese recaer no procedemento sancionador incoado para tal efecto, o órgano competente retirará a citada tarxeta durante un prazo de dous anos.

Disposición adicional.-

A presente ordenanza, conforme ao disposto no artigo 70.2 da Lei 7/1985, de 2 de abril, entrará en vigor así que transcorra o prazo de 15 días hábiles desde a publicación do seu texto íntegro no Boletín Oficial da Provincia. Esta ordenanza permanecerá vixente ata a súa modificación ou derogación expresa.

Anexo I

Solicitud de tarxeta de estacionamento para persoas con discapacidade

Expediente Nº: _____

1. Datos da persoa solicitante:

Nome e apelidos _____ DNI _____

En representación de _____ DNI _____

Domicilio: _____ C.P. _____

Localidade _____ Provincia _____ Teléfono _____ .

2. Solicitud.

Solicito que me sexa concedida a **tarxeta de estacionamento para persoas con mobilidade reducida**

Debe achegar a seguinte documentación:

- **Fotocopia do DNI cotexada.**
- **Certificado de discapacidade.**
- **Dúas fotografías tamaño carné.**
- **Certificado de empadramento.**

- **Informe dos EVO sobre a dificultade para o uso dos transportes públicos.**
- **Documentación relativa ao vehículo** (só no caso de persoas xurídicas).

3. Declaración: lugar, data e sinatura

A persoa abaixo asinante fai declaración expresa e responsable da veracidade de todos os datos que figuren na presente solicitude.

Ames, a ____ de _____ de 200__

Asdo.:

***Tarxeta de estacionamento para persoas con mobilidade reducida** regulada xuridicamente nos artigos 50, 51 e 52 do **Decreto 35/2000, de 28 de xaneiro**, que aproba o Regulamento de desenvolvemento e execución da **Lei 8/97, de 20 de agosto**, de accesibilidade e supresión de barreiras na Comunidade Autónoma de Galicia.

Informe de Valoración

Vista a solicitude de **tarxeta de estacionamento** con número de expediente _____ e tendo en consideración a documentación achegada polo/a solicitante e a ordenanza municipal correspondente, os servizos sociais de atención primaria deste Concello propoñen:

☐

a CONCESIÓN da tarxeta de estacionamento solicitada

☐

a DENEGACIÓN da tarxeta de estacionamento solicitada

Motivos de denegación:

Ames, ____ de _____ de 200__

Asdo. A/o traballador/a social

Concesión / Denegación tarxeta de estacionamento

Tendo en consideración a documentación achegada e o informe de valoración dos técnicos de servizos sociais do Concello RESOLVO:

☐ CONCEDERLLE a tarxeta de estacionamento a
D/D^a _____

☐ DENEGARLLE a tarxeta de estacionamento a
D/D^a _____

Motivos de denegación:

Ames, _____ de _____ de 200_____

Asdo. O alcalde

Anexo II

Solicitud de tarxeta de accesibilidade para persoas con discapacidade

Expediente N°: _____

1. Datos da persoa solicitante:

Nome e apelidos _____ DNI _____

En representación de _____ DNI _____

Domicilio: _____ CP _____

Localidade _____ Provincia _____ Teléfono _____ .

2. Solicitud.

Solicito que me sexa concedida a **tarxeta de accesibilidade para persoas con discapacidade**

Debe achegar a seguinte documentación:

- **Fotocopia do DNI cotexada.**
- **Certificado de discapacidade.**
- **Dúas fotografías tamaño carné.**
- **Certificado de empadramento.**

3. Declaración: lugar, data e sinatura.

A persoa abaixo asinante fai declaración expresa e responsable da veracidade de todos os datos que figuren na presente solicitude.

Ames, ____ de _____ de 200__

Asdo.:

Informe de Valoración

Vista a solicitude de **tarxeta de accesibilidade** con número de expediente _____ e tendo en consideración a documentación achegada polo/a solicitante e a ordenanza municipal correspondente, os servizos sociais de atención primaria deste Concello propoñen:

☐

a CONCESIÓN da tarxeta de estacionamento solicitada

☐

a DENEGACIÓN da tarxeta de estacionamento solicitada

Motivos de denegación:

Ames, ____ de _____ de 200__

Asdo. A/o traballador/a social

Concesión / Denegación tarxeta de accesibilidade

☐ CONCEDERLLE a tarxeta de accesibilidade a
D/D^a _____

☐ DENEGARLLE a tarxeta de accesibilidade a
D/D^a _____

Motivos de denegación:

Ames, _____ de _____ de 200____

Asdo. O alcalde

Xustificante da entrega da tarxeta de estacionamento / accesibilidade

Na data _____ de _____ de 200____, foime entregada

☐ a tarxeta de estacionamento

☐ a tarxeta de accesibilidade.

Recibín,

Asdo. _____

Punto Quinto.- Inicio de expediente para posta a disposición de parcela na localidade de Bertamiráns a favor da Xunta de Galicia para escola de educación infantil.

Solicita a palabra plantexando unha cuestión de orde o voceiro do grupo municipal popular don **Santiago Amor Barreiro** para dicir: Na convocatoria que se nos fixo chegar da comisión informativa permanente de Urbanismo, Vivenda, Planificación de Infraestruturas e Obras Públicas, na orde do día figuraba *Inicio de expediente para cesión gratuíta de parcela na localidade de Bertamiráns a favor da Xunta de Galicia para escola de educación infantil e Inicio de expediente para cesión gratuíta de parcela na localidade de O Milladoiro a favor da Xunta de Galicia para edificio destinado á terceira idade*, sen embargo na convocatoria deste pleno, nos puntos

quinto e sexto aparece Inicio de expediente para posta a disposición de parcela en vez de cesión gratuíta como figuraba na convocatoria da comisión informativa e na acta da mesma, por tanto o que se ditaminou nesa comisión foi a cesión gratuíta, e non a posta a disposición. Como existe esta discrepancia entre o acordo ditaminado na comisión informativa e o acordo que hoxe se trae a pleno solicitamos unha aclaración posto que se está a falar de cousas diferentes.

Toma a palabra o señor alcalde don **Carlos Antonio Fernández Castro** para dicir: ¿É unha aclaración, o que solicitan?

Continúa o señor **Amor Barreiro**: Si, que se nos aclare cal é o motivo de que na convocatoria da comisión figure unha cousa e na convocatoria de pleno outra diferente.

Continúa o señor **alcalde**: Deduzo que se trata de poñer a disposición ambas as dúas parcelas a favor da Xunta de Galicia para cada unha das finalidades previstas. En todo caso e toda vez que hai unha denominación diferente me cabe preguntar á señora secretaria xeral se hai algún inconveniente legal para que podamos seguir tratando estes asuntos.

Intervén a instancia da presidencia a señora secretaria do concello dona **Rosa Ana Prada Queipo** para dicir que dado que a cesión gratuíta é un grado superior á posta a disposición, non habería ningún problema en adoptar este acordo de inicio de posta a disposición.

Continúa o señor **Amor Barreiro**: Gustárame que constara en acta esa apreciación que fai a secretaria. O acordo que imos tomar ¿é o de cesión gratuíta, non o de posta a disposición?

A señora **secretaria** lle responde non, o acordo que se presenta a pleno é o de inicio de expediente de posta a disposición.

Di o señor **alcalde**: Tal e como figura na orde do día do pleno. Continúa dicindo, substancialmente, que a intención do goberno é que a Xunta de Galicia estime construír unha escola de Educación Infantil. A pretensión é ter unha segunda escola de educación infantil en Bertamiráns sendo a demanda de prazas parella á do Milladoiro. Di que o proceso de posta a disposición da parcela require dunha serie de trámites que comezan con este inicio de expediente. Di o señor alcalde que introducido o asunto procede abrir unha primeira quenda de intervencións.

Solicita a palabra por cuestión de orde o concelleiro do grupo municipal popular don **Santiago Amor Barreiro** para dicir: Entendo que dende a Alcaldía se vai manter este punto aínda que non foi ditaminado tal e como figura na orde do día na comisión informativa ¿se vai manter?.

Contesta o señor **alcalde**: Toda vez que a señora secretaria xeral acaba de informar no sentido de que non existe inconveniente xurídico para elo, claro que se mantén.

Continúa o señor **Amor Barreiro**: A señora secretaria tamén dixo que son rangos diferentes un término e o outro.

Contesta o señor **alcalde**: O que pode o mais pode o menos, segundo un principio xeral de Dereito, polo tanto dacordo co informe *in voce* da secretaria xeral non habería ningún inconveniente xurídico para tomar tal decisión por parte do pleno, por suposto que se mantén a proposta.

Continúa o señor **Amor Barreiro**: O digo porque cesión gratuíta ten un rango superior que posta a disposición de parcela.

Contesta o señor **alcalde**: Señor Amor, quedou suficientemente claro e a señora secretaria dixo que precisamente por ser este rango inferior ao anterior é

perfectamente abordable o asunto. Abrimos unha quenda de intervencións, ten a palabra o señor Fernández López.

Intervén o voceiro do grupo municipal do BNG don **Xosé Manuel Fernández López** para dicir substancialmente que a pretensión do grupo municipal de goberno é iniciar os trámites para poñer a disposición unha parcela que aínda non está desafectada, froito dunha segregación. Manifesta coincidir plenamente no obxectivo, Bertamiráns precisa unha segunda escola de 0 a 3 anos, querendo destacar que como nesta lexislatura non existen propostas de resolución por parte do goberno ás veces pasa tempo ate clarexar o que van votar. A continuación o señor Fernández fai referencia ao punto 2 do informe de secretaría, preguntándose cómo saber o que pretende a Consellería de Traballo e Benestar se non hai documentación, supón que a secretaria do concello o di por algo, indica que na comisión informativa se interesaron pola documentación e se lles contestou que non existía. Di que descoñecen que tipo de características ten que ter esa escola e que faltan datos, reiterando que quizás haxa un cambio cualitativo entre cesión gratuíta e poñer a disposición, non son o mesmo. O mais discutible para o seu grupo é a parcela en si mesma, ao seu entender non axeitada pola forma irregular, ademais de diminuír un aparcamento de carga e descarga moi utilizado para acceder ao salón de actos cegando un dos accesos á Casa da Cultura, limitando a súa ampliación, ademais de inviabilizar a ampliación da escola en cuestión. Opina que a parcela está metida con calzador e satura un espazo urbano, profundizando en erros urbanísticos anteriores.

Intervén o voceiro do grupo municipal popular don **Santiago Amor Barreiro**, que manifesta substancialmente que da segregación de tres parcelas se obtén unha parcela de forma estraña que de utilizarse pode supoñer un grave problema, impedindo o crecemento do PAC, asfixiando a Casa da Cultura, mermando a carga e descarga de materiais para actividades e cercenando as posibilidades de futura ampliación da escola infantil. Di tamén que dos orzamentos 2008 ao final non se vendeu nada do patrimonio previsto, e o alcalde como responsable de urbanismo debería ser quen de facer xestión urbanística e poñer a disposición da Xunta de Galicia parcelas mellores, estando o PP de acordo en que Ames teña equipamentos pero descoñecendo por que se fai esta elección non avalada por ninguén, e que de ter interese real de chegar a consenso, antes da convocatoria deste pleno podería terse convocado aos voceiros municipais, pero que só se atenderon intereses partidistas e non os de Ames.

Indica que no expediente non aparece ningún protocolo entre o Consorcio e o Concello, que debería haber cando menos unha declaración de intencións. Que a segregación tampouco está inscrita no Rexistro da Propiedade de Negreira e que debería de esperarse a ter feito tal trámite.

Toma a palabra o señor alcalde don **Carlos Antonio Fernández Castro** o cal substancialmente di que tentando dar resposta ás cuestións plantexadas e concretamente ao señor Fernández López, manifesta que só hai de momento información verbal pero que sabedores da intención manifestada polas persoas oportunas parece conveniente poñer a disposición esta parcela. Que o acordo que se pretende adoptar non vai mais alá, de momento, e non se perde nada por facelo .

Respecto da parcela di que neste momento o que se debate non é o proxecto arquitectónico, e que en opinión dos técnicos de urbanismo do concello sería posible ubicar nesa parcela irregular unha edificación na zona trapezoidal e na parte rectangular unha zona de xogos semellante a unha das existentes na Praza de Manuel Murguía, con resultados magníficos e que o proxecto arquitectónico *non nato* non pode ser excusa para non poñer a disposición a parcela.

En canto a que a escola non se puidese ampliar, sempre se podería ampliar en altura, como a escola da Madalena. En relación a que quede a parcela saturada di que é exactamente o mesmo caso que a que se vai inaugurar en breve no Milladoiro, e que se a non posibilidade de ampliación en superficie non foi impedimento para o Consorcio tampouco o pode ser agora para esta escola.

Engade que o crecemento do Centro de Saúde está falado coa Consellería de Sanidade, e que nas conversas de intercambio de documentos coa Consellería, tras o acordo plenario, esta manifestou que a parcela é a que teñen, de configuración e dimensións limitadas, e que no caso de plantexarse ampliacións o pensaban facer en altura. Lembra que cando se pon a disposición dun órgano unha parcela os técnicos do mesmo pasan a validala, polo que non deben de adiantarse acontecementos.

Abre seguidamente unha segunda quenda de intervencións outorgando a palabra ao voceiro do grupo municipal do BNG don **Xosé Manuel Fernández López**, o cal di substancialmente que o que se está propoñendo se pode seguir debatendo pero que en resumen é unha chapuza e hai falta de xestión urbanística, propón sentarse os grupos municipais e propoñer outras parcelas, convencido de que hai outras alternativas en Bertamiráns, por exemplo de cesións anticipadas. Incide no dito na primeira quenda engadindo que facer a escola nesa parcela sería a costa de ceder espazo de ocio, espazo aberto, e que no seu día cando se estudou a ampliación da Casa da Cultura se plantexou non ocupar o espazo verde e ir a un modelo de ocupación lixeira que permitise o movemento polo entorno, entendendo que no 2010 non cre que a escola infantil da Madalena sexa un modelo urbanístico. En canto ás conversas dille que el non se fía da súa palabra e móvese por documentos enriba da mesma e que non fala do proxecto, senón desa parcela e as consecuencias nesa zona, os informes técnicos falan da legalidade e o BNG fala da oportunidade e do interese público, recordándolle que respecto da escola infantil de Bertamiráns e do Centro de Día do Milladoiro o BNG díxolle no seu día que llo ofertase ao goberno bipartito da anterior Xunta de Galicia, e a resposta do alcalde sempre era que non había ningunha solicitude formal e para evitar que parcelas estivesen apalancadas durante anos. Remata dicindo que se o que se quere é unha manifestación política do pleno sobre a necesidade dunha nova escola infantil para Bertamiráns, o BNG non ten inconveniente.

Intervén o voceiro do grupo municipal popular don **Santiago Amor Barreiro** para dicir substancialmente que o señor alcalde ten que ser realista e asumir que esa non é a mellor parcela. Cualifícao de barbaridade ou indecencia urbanística e non entende o porqué desta decisión salvo que sexa por actitude propagandística, reiterando que non hai nada por escrito, que algo semellante fixeron outros concellos, e pregúntase se o señor alcalde quere formar parte deses douscentos e pico concellos que puxeron a disposición do Consorcio parcelas, que non cederon, para diversos fins. Que dende o seu grupo municipal están en condicións de poder afirmar que hai equipamentos que poden ser realidade en Ames porque a Consellería así llo trasladou, pero sempre que se cumpran condicións mínimas que o señor alcalde non está cumprindo, que debería propoñer outra parcela mais axeitada e abrir diálogo coa oposición, suposto no que o seu grupo votaría afirmativamente, pero o seu grupo non pode permitir cometer erros en Bertamiráns coma no seu momento se fixo no Milladoiro co Centro de Saúde, e que o señor alcalde quere facer agora o mesmo que criticou antes. Remata dicíndolle ao señor alcalde que se leva adiante isto terá perdido a oportunidade de dotar a Bertamiráns dun equipamento mellor.

Toma a palabra o señor alcalde don **Carlos Antonio Fernández Castro** o cal substancialmente indica que percibe falta de interese na oposición en apoiar unha proposta do goberno municipal absolutamente meditada e contrastada. Dille ao voceiro do BNG que o que afirma sobre cesións anticipadas en Bertamiráns o

precise, porque o señor Fernández López debería lembrar que cando o seu grupo formou parte do goberno non foron quen de conseguilo no caso do campo de fútbol do Milladoiro, e que el non dubida da súa palabra. En canto a eliminar un espazo aberto considera que non é argumento porque quedará unha zona entre a Casa da Cultura e o Centro de Saúde que será parque infantil que non levantará mais dun metro do chan coa alternativa de ser de uso compartido, para poder ser usado pola veciñanza en horario non lectivo.

Neste momento da orde do día intervén o señor García Argibay advertíndolle o alcalde por primeira vez que non está no uso da palabra.

Continúa o señor alcalde dicindo que está contrastado arquitectonicamente, que o recinto poda ter dobre acceso, lanzando o reto de que sexan os técnicos os que demostren a inviabilidade da parcela.

Neste momento intervén o señor Amor e o alcalde faille dúas advertencias de non estar no uso da palabra.

En canto á cualificación da súa xestión urbanística dille ao señor Fernández que é a mesma que compartiron nos catro anos do bipartito sen discrepancias, ademais de que cando o seu grupo municipal propuxo o plan parcial do S-10, ate hai un mes ese sector estivo hipotecado por estar incluído no plan sectorial da consellería de vivenda que ao final quedou en nada, advertíndolle que non está no uso da palabra, e con respecto ao que dixo de acordo político e chamar á oposición para consensuar preguntase se o problema é que un goberno goberne, tome decisións e faga propostas. Seguidamente o señor alcalde da lectura a varios documentos referentes a compromisos da Xunta de Galicia con concellos para diversos equipamentos, preguntándose se Ames non ten dereito a entrar nese mesmo nivel de demanda.

En relación á insistencia sobre que non hai protocolo ou convenio o señor alcalde reitera que hai conversas e iniciativas. Se refire de seguido á pregunta feita polo concelleiro David Santomil nun pleno anterior sobre se había convenio para un CEIP no Milladoiro, naquel momento lle contestara que non, que había un compromiso verbal. Agora con data 25 de febreiro de 2010 ten entrada no rexistro do concello un escrito asinado polo secretario xeral da Consellería de Educación e Ordenación Universitaria no sentido de que estando programado tal equipamento compre que o concello de Ames oferte posibles solares para que os técnicos os avalíen, escrito ao que da lectura, tras o cal di que a resposta ao señor Santomil sería que hoxe segue sen haber protocolo nin convenio pero si un escrito que acompaña unha proposta de convenio que naturalmente vaise tramitar, podendo ocorrer o mesmo dentro duns meses no caso que están a debater. Remata dicindo que perder esta oportunidade de propoñer a parcela sería unha grave perda para o concello e que en todo caso se esta non é axeitada corresponde aos técnicos dicilo e haberá que poñerse a buscar outra se a hai, porque o goberno leva tempo buscando e só atopou esta, pois os desenvolvementos urbanísticos que tiñan que xerar parcelas de equipamentos están parados polas circunstancias actuais de mercado.

Rematadas as intervencións o pleno da corporación por maioría simple, cos votos a favor dos 8 membros presentes do grupo municipal socialista e a abstención dos 7 membros do grupo municipal popular e dos 5 membros do grupo municipal do BNG, acorda:

Primeiro.- Inicio de expediente para posta a disposición de parcela na localidade de Bertamiráns a favor da Xunta de Galicia para escola de educación infantil, parcela municipal resultante das operacións de segregación e agrupación de fincas autorizada en Xunta de Goberno Local de 10 de febreiro de 2010, cunha superficie bruta de 1.849 m² e dunha superficie neta (detráido o espazo destinado a viais) de 1.500 m².

Segundo.- Facultar ao señor alcalde presidente para cantas actuacións de trámite sexan precisas para a mellor execución do acordado.

O señor alcalde agradece aos grupos popular e do BNG que coa súa abstención facilitasen que o goberno en minoría tomase unha decisión moi importante para o pobo de Ames, pois había unha seria e clara intención de obstruír tal decisión.

Neste momento do desenvolvemento da sesión, os señores concelleiros dos grupos municipais popular e do BNG abandonan o salón de plenos en sinal de protesta pola diferenza existente entre os puntos da orde do día do pleno e da comisión informativa. *Como explicación desta ausencia se reflicte tamén, a petición expresa dos grupos municipais popular e do BNG, con ocasión da aprobación da acta desta sesión en sesión de 25 de marzo de 2010, que o abandono foi porque non se lles explicou o cambio de quórum para a votación, que pasaba de maioría absoluta a maioría simple sen que se lles advertise previamente.*

Pide a palabra a señora secretaria do concello dona **Rosa Ana Prada Queipo** para dicir que solicita que conste expresamente na acta da sesión o seguinte: que efectivamente o que foi ditaminado na comisión informativa foi un expediente de inicio de cesión gratuíta que como é preceptivo require quórum de maioría absoluta, pero que o que se trouxo a pleno foi un inicio de expediente de posta a disposición e non de cesión gratuíta, xa que non había no día da convocatoria do pleno ningunha oferta ou solicitude concreta por parte da Xunta de Galicia, se reduce o nivel de esixencia xurídica, é un acordo de inicio de expediente de posta a disposición que require un quórum de maioría simple e non absoluta. Cando a Xunta de Galicia, de ser o caso, preste aceptación á oferta e concrete as súas necesidades haberá que volver a pleno, xa sabendo as dimensións concretas das que se pretende a cesión gratuíta, e o acordo de inicio de expediente precisará entón quórum de maioría absoluta, como é preceptivo, sendo o primeiro paso a desafectación, que tamén require quórum de maioría absoluta.

Toma a palabra o señor alcalde don **Carlos Antonio Fernández Castro** para dicir que como alcalde ten a grande satisfacción de ter aprobado este punto e que só queda que a Xunta de Galicia actúe de xeito razoable e non partidista, analizando tecnicamente a parcela xa que segundo os informes técnicos que manexa o concello a parcela é perfectamente viable para tal fin.

A continuación pregunta á señora secretaria se unha vez abandonado o salón de sesións polos concelleiros dos grupos popular e do BNG, hai quórum suficiente para continuar, respondendo a señora secretaria que sendo os concelleiros presentes 8 e sendo precisa a terceira parte da corporación para continuar o pleno segundo o artigo 90 do ROF, existe quórum suficiente.

Punto Sexto.- Inicio de expediente para posta a disposición de parcela na localidade de O Milladoiro a favor da Xunta de Galicia para edificio destinado á terceira idade.

Toma a palabra o señor alcalde don **Carlos Antonio Fernández Castro** para dicir substancialmente que este punto é igual que o anterior. Que a parcela está moi próxima á cedida para novo Centro de Saúde do Milladoiro do que a Consellería de Sanidade está redactando o proxecto técnico. É idónea para edificio da terceira idade, tendo tecnicamente todos os avais e os informes favorables.

O pleno da corporación por unanimidade dos membros presentes, tras o abandono do salón de sesións dos representantes dos grupos municipais popular e do BNG e co voto a favor dos 8 membros presentes do grupo municipal socialista, acorda:

Primeiro.- Inicio de expediente para posta a disposición de parcela na localidade de O Milladoiro a favor da Xunta de Galicia para edificio destinado á terceira idade,

parcela de 3.452 m², inscrita no Rexistro da Propiedade de Negreira, finca 34.487, tomo 1.387, libro 529, folio 91, sita no lugar de O Milladoiro, sector S-15 (Travesía do Porto Sur) .

Segundo.- Facultar ao señor alcalde presidente para cantas actuacións de trámite sexan precisas para a mellor execución do acordado.

Punto Sétimo.- Toma de coñecemento polo Pleno da renuncia do concelleiro don Santos Lorenzo Lorenzo.

Toma a palabra o señor alcalde don **Carlos Antonio Fernández Castro** para dicir que o concelleiro don Santos Lorenzo Lorenzo presentou a súa renuncia por escrito rexistrado o día 3 de febreiro, ao que da lectura.

Continúa o señor alcalde informando que existe un informe de secretaría sobre a tramitación, informando da renuncia anticipada dos cinco seguintes candidatos da lista, correspondendo ocupar a vacante á seguinte candidata da que se debe solicitar expedición de credencial. Remata a súa intervención dicindo que conste en acta o agradecemento polo traballo desenvolvido por don Santos Lorenzo Lorenzo no tempo que foi concelleiro desta corporación municipal, agradecéndolle os seus desexos para todos os concelleiros e concelleiras que integran a corporación na defensa dos veciños e veciñas de Ames, felicitándoo por ter participado nunha corporación democraticamente elixida e traballando en prol dos veciños e veciñas de Ames durante o tempo que pertenceu á corporación e permaneceu no seu cargo de concelleiro.

Rematadas as intervencións o pleno da corporación toma coñecemento da renuncia ao cargo do concelleiro don **Santos Lorenzo Lorenzo** e declara a vacante producida no grupo municipal socialista deste concello acordando remitir copia do expediente á Xunta Electoral Central, tendo en conta as renuncias anticipadas dos 5 seguintes candidatos da lista electoral na que se produciu a vacante e que presentadas o 24 de febreiro de 2010 corresponden a dona Rocío Seoane Bra, dona Susana Señorís Rodríguez, don Ricardo Jesús Rey Gómez, don Luís Hernesto Lisson Verastegui e dona María Ángeles García Veiga. Todas as renuncias foron formuladas por escrito e no ofrecen dúbidas da súa autenticidade, polo que tomado polo pleno coñecemento das mesmas, acórdase:

Primeiro.- Solicitar á Xunta Electoral Central a expedición da credencial a favor da seguinte candidata da lista na que se produciu a vacante (Partido dos Socialistas de Galicia - Partido Socialista Obreiro Español) que resulta ser dona Carmen Fraga Crespo.

Expedida a credencial a favor de dona **Carmen Fraga Crespo**, a súa destinataria terá dereito a tomar posesión no primeiro pleno que se celebre.

Segundo.- Facultar ao señor alcalde presidente para cantas actuacións de trámite sexan precisas para a mellor execución do acordado.

Punto Oitavo.- Mocións.

Moción do grupo municipal do BNG de adhesión do concello de Ames ao manifesto Galiza ten dereito .

ADHESIÓN DO CONCELLO DE AMES AO MANIFESTO: GALIZA TEN DEREITO

O día 5 de febreiro foi asinado o manifesto “Galiza ten dereito”, por representantes dos sindicatos CIG, CCOO, UGT, dos partidos políticos BNG e PP, e polo representante da Confederación Galega de Empresarios (CEG). Por tanto por un amplo e plural abano de representantes sociais.

O proceso de reordenación bancaria que se está a producir no Estado Español ten consecuencias inmediatas tamén en Galiza, e conleva o risco de que os galegos e galegas perdamos as nosas caixas de aforros pola deslocalización dos seus centros de decisión, e que estas entidades de carácter social se transformen en entidades financeiras privadas.

O Parlamento e Galiza aprobou por ampla maioría unha reforma da Lei de Caixas que democratiza estas institucións, fai a súa xestión máis transparente, reforza as facultades do autogoberno para defender o sistema financeiro propio e supervisar a actuación das caixas, e que garante que estas entidades sexan efectivamente alavancas de desenvolvemento da economía produtiva do País.

A resposta do Goberno central a este acto de afirmación do autogoberno galego non pode ser máis desalentadora: presentar un recurso de inconstitucionalidade contra a Lei de Caixas de Galiza que conleva a paralización da súa aplicación nun momento decisivo, o que pode colocalas na situación idónea para que sexan absorbidas por entidades foráneas.

Os concellos galegos, como entidades representativas dos cidadáns e ademais directamente interesadas en contar con entidades financeiras solventes e galegas, non poden quedar á marxe deste proceso histórico de defensa das caixas de aforro galegas.

Por isto, o grupo municipal do BNG propón que o Pleno da Corporación Municipal de Ames adopte os seguintes acordos:

- 1. Aprobar a adhesión do Concello de Ames ao Manifesto “Galiza ten dereito”, asinado o día 5 de febreiro por representantes da CIG, CCOO, UGT, CEG, BNG e PP.*
- 2. Remitir este acordo ao Parlamento de Galiza, á Presidencia da Xunta, ao Presidente do Goberno Español.*
- 3. Remitir este acordo plenario aos medios de comunicación.*

Manifesto Galiza ten dereito

Estamos asistindo a un proceso de reordenación bancaria, impulsado polo Banco de España e o goberno central, que conleva o risco de que Galiza perda as súas caixas de aforro pola deslocalización dos seus centros de decisión, e que estas entidades de carácter social se transformen en entidades financeiras privadas.

Frente a este risco, as institucións galegas de autogoberno reaxiron. O Parlamento galego adoptou por unanimidade o acordo de establecer como prioridade o mantemento dea galeguidade das caixas, a súa solvencia, e a necesidade de tramitar por urxencia a reforma da Lei galega de Caixas.

O Parlamento de Galiza aprobou por ampla maioría unha reforma da Lei de Caixas que democratiza estas institucións, fai a súa xestión máis transparente, reforza as facultades do autogoberno para defender o sistema financeiro propio e supervisar a actuación das caixas, e que garante que estas entidades sexan efectivamente alavancas de desenvolvemento da economía produtiva do País.

A resposta do Goberno central a este acto de afirmación do autogoberno galego non pode ser máis desalentadora: presentar un recurso de inconstitucionalidade contra a Lei de Caixas de Galiza que conleva a paralización da súa aplicación nun momento decisivo, o que pode colocalas na situación idónea para que sexan absorbidas por entidades foráneas.

Sen a fusión das dúas caixas galegas, Galiza ficaría sen sistema financeiro propio, perdendo un dos principais instrumentos para o seu desenvolvemento económico.

Conscientes da gravidade da situación, manifestamos:

1. **Galiza ten dereito a ter un sistema financeiro eficiente ao servizo do País**, regulado polo seu Parlamento, como expresión do autogoberno. É vital, por tanto, preservar a Lei de Caixas de Galiza.
2. **Galiza ten dereito a que o Estado respecte o autogoberno galego**. Que non nos dean tratamento de autonomía de segunda, cuestionando a constitucionalidade da lei galega, si non se fixo coa basca, a catalá ou a andaluza. Por que se recorre a nosa e non a deses outros territorios? O Goberno central debe reconsiderar o asunto e aceptar que as institucións galegas de autogoberno, dentro do marco competencial vixente, teñen capacidade para dotarnos do marco xurídico que se considere máis acaído para defender os intereses de todas as galegas e galegos, como ordena o Estatuto de Autonomía de Galiza.
3. **Galiza ten dereito a propiciar a fusión das súas caixas**. O goberno central tamén debe aceptar que as institucións galegas teñen tanto dereito como as de calquera outra Comunidade Autónoma para impulsar unha fusión dentro do país, cando se cumpren as mesmas condicións. Galiza ten dereito a preservar e garantir a galeguidade das caixas galegas coa súa fusión. Unha fusión paritaria, da que xurda unha Caixa solvente como mellor garantía para os seus traballadores, os impositores e todas e todos os galegos.

Está en xogo boa parte do noso futuro, a dignidade do noso autogoberno e perto de 80.000 millóns de euros en activos, isto é, a maior parte do aforro das galegas e dos galegos. Está en xogo que ese aforro se invista aquí ou se desvíe cara a financiar o desenvolvemento doutros territorios.

Galiza debe defender o seu. Ten dereito.

Toma a palabra o señor alcalde don **Carlos Antonio Fernández Castro** para dicir que non estando presentes os propoñentes desta moción non se abre diálogo, preguntando á señora secretaria se é posible pasar directamente á votación, ao que dona **Rosa Ana Prada Queipo** responde afirmativamente.

O pleno da corporación, tras o abandono do salón de sesións dos representantes dos grupos municipais popular e do BNG, co voto en contra de 7 membros do grupo municipal socialista e a abstención da concelleira do grupo municipal socialista dona Úrsula Seijas Seoane, rexeita a moción do grupo municipal do BNG de adhesión do concello de Ames ao manifesto Galiza ten dereito.

b) Moción do grupo municipal popular de adhesión ao manifesto “Galicia ten dereito”.

EXPOSICIÓN DE MOTIVOS

As caixas de aforros de Galicia, en canto entidades financeiras de carácter social e de natureza fundacional, teñen unha clara vinculación co territorio no que se asentan, sendo un instrumento fundamental no financiamento da economía galega. É precisamente esa función, a que ha de contribuír a mellorar o nivel socioeconómico de Galicia, mais necesario que nunca nun contexto coma o actual de recesión económica e dificultades financeiras.

O 29 de decembro de 2009 o Parlamento de Galicia, en desenvolvemento do artigo 30.1.5 do Estatuto de Autonomía, aprobou cunha maioría cualificada de 2/3, a Lei 10/2009, do 30 de decembro, pola que se efectúa unha modificación lexislativa das caixas de aforros de Galicia.

A reforma da Lei de Caixas que democratiza estas institucións, fai a súa xestión máis transparente, reforza as facultades do autogoberno para defender o sistema financeiro propio e supervisar a actuación das caixas, e garante que estas entidades sexan efectivamente pezas claves para o desenvolvemento da economía produtiva do país.

A resposta do Goberno central a este acto de afirmación do autogoberno galego non pode ser máis desalentadora: presentar un recurso de inconstitucionalidade contra a Lei de Caixas de Galicia que conleva a paralización da súa aplicación nun momento decisivo, o que pode colocalas na situación idónea para que sexan absorbidas por entidades foráneas.

Sen a fusión das dúas caixas galegas, Galicia ficaría sen sistema financeiro propio, perdendo un dos principais instrumentos para o seu desenvolvemento económico.

Por iso, o 5 de febreiro de 2010, reunidos no Parlamento de Galicia, o representante dos empresarios galegos, os representantes das organizacións sindicais CIG, CCOO e UGT, e máis os representantes dos partidos políticos BNG e PP, acordaron asinar o manifesto “Galicia ten dereito” sobre o futuro do sistema financeiro galego, e trasladar ao resto da sociedade o seu contido para que se sumen todas aquelas institucións, organizacións, asociacións, entidades ou persoas que coincidan cos seus postulados.

Por todo iso, o Grupo Municipal Popular somete para a súa toma en consideración polo Pleno da Corporación a seguinte:

PROPOSTA DE ACORDO

O pleno do Concello de Ames acorda adherirse ao Manifesto “Galicia ten dereito” dando traslado deste acordo plenario ao Parlamento de Galicia, á Xunta de Galicia, e ao Goberno de España.

Manifesto Galicia ten dereito

Estamos asistindo a un proceso de reordenación bancaria, impulsado polo Banco de España e o goberno central, que conleva o risco de que Galicia perda as súas caixas de aforro pola deslocalización dos seus centros de decisión, e que estas entidades de carácter social se transformen en entidades financeiras privadas.

Frente a este risco, as institucións galegas de autogoberno reaxiron. O Parlamento galego adoptou por unanimidade o acordo de establecer como prioridade o mantemento dea galeguidade das caixas, a súa solvencia, e a necesidade de tramitar por urxencia a reforma da Lei galega de Caixas.

O Parlamento de Galicia aprobou por ampla maioría unha reforma da Lei de Caixas que democratiza estas institucións, fai a súa xestión máis transparente, reforza as facultades do autogoberno para defender o sistema financeiro propio e supervisar a actuación das caixas, e que garante que estas entidades sexan efectivamente alavancas de desenvolvemento da economía produtiva do País.

A resposta do Goberno central a este acto de afirmación do autogoberno galego non pode ser máis desalentadora: presentar un recurso de inconstitucionalidade contra a Lei de Caixas de Galicia que conleva a paralización da súa aplicación nun momento decisivo, o que pode colocalas na situación idónea para que sexan absorbidas por entidades foráneas.

Sen a fusión das dúas caixas galegas, Galicia ficaría sen sistema financeiro propio, perdendo un dos principais instrumentos para o seu desenvolvemento económico.

Conscientes da gravidade da situación, manifestamos:

1. ***Galicia ten dereito a ter un sistema financeiro eficiente ao servizo do País***, regulado polo seu Parlamento, como expresión do autogoberno. É vital, por tanto, preservar a Lei de Caixas de Galicia.
2. ***Galicia ten dereito a que o Estado respecte o autogoberno galego***. Que non nos dean tratamento de autonomía de segunda, cuestionando a constitucionalidade da lei galega, si non se fixo coa basca, a catalá ou a andaluza. Por que se recorre a nosa e non a deses outros territorios? O Goberno central debe reconsiderar o asunto e aceptar que as institucións galegas de autogoberno, dentro do marco competencial vixente, teñen capacidade para dotarnos do marco xurídico que se considere máis acaído para defender os intereses de todas as galegas e galegos, como ordena o Estatuto de Autonomía de Galicia.
3. ***Galicia ten dereito a propiciar a fusión das súas caixas***. O goberno central tamén debe aceptar que as institucións galegas teñen tanto dereito como as de calquera outra Comunidade Autónoma para impulsar unha fusión dentro do país, cando se cumpren as mesmas condicións. Galicia ten dereito a preservar e garantir a galeguidade das caixas galegas coa súa fusión. Unha fusión paritaria, da que xurda unha Caixa solvente como mellor garantía para os seus traballadores, os impositores e todas e todos os galegos.

Está en xogo boa parte do noso futuro, a dignidade do noso autogoberno e perto de 80.000 millóns de euros en activos, isto é, a maior parte do aforro das galegas e dos galegos. Está en xogo que ese aforro se invista aquí ou se desvíe cara a financiar o desenvolvemento doutros territorios.

Galicia debe defender o seu. Ten dereito.

O pleno da corporación, tras o abandono do salón de sesións dos representantes dos grupos municipais popular e do BNG, co voto en contra de 7 membros do grupo municipal socialista e a abstención da concelleira do grupo municipal socialista dona Úrsula Seijas Seoane, rexeita a moción do grupo municipal popular de adhesión ao manifesto Galicia ten dereito.

c) Moción do grupo municipal socialista con motivo do 8 de marzo, día internacional da muller.

O señor alcalde don **Carlos Antonio Fernández Castro** outorga a palabra á concelleira delegada de Benestar Social e Igualdade dona **Isabel González Cancela**, que da lectura á parte dispositiva da moción.

O pleno da corporación por unanimidade, tras o abandono do salón de sesións dos representantes dos grupos municipais popular e do BNG e co voto a favor dos 8 membros presentes do grupo municipal socialista presta aprobación á moción do grupo municipal socialista con motivo do 8 de marzo, día internacional da muller.

O texto da moción aprobada é do teor literal seguinte:

Moción do grupo municipal socialista con motivo do 8 de marzo, día internacional da muller.

Exposición de motivos:

Recordando o I Cumio de Mulleres no Poder celebrada en Atenas en 1992, as declaracións que se teñen sucedido no ámbito da Unión Europea e o actual Pacto Europeo pola igualdade entre mulleres e homes, as Ministras e líderes políticas dos

Estados Membros da Unión Europea, reunidas en Cádiz, a iniciativa dos Gobernos de España e Reino Unido celebraron o II Cumio Europeo de Mulleres no Poder.

Coincidindo que estes tempos de crise ofrecen unha oportunidade única para o cambio, xa que a igualdade entre mulleres e homes é unha condición previa para o crecemento sostible, o emprego, a innovación, a competitividade e a cohesión social. Que no 2010, a Comisión Europea renovará o seu compromiso de promover a igualdade, adoptando unha estratexia que substitúa a actual folla de ruta para a igualdade entre mulleres e homes.

Que a Unión Europea aprobará unha nova estratexia de crecemento e emprego para os vindeiros dez anos.

Que se conmemora o XV aniversario da Plataforma de Acción de Beijing, e que se teñen cumprido 30 anos da adopción da Convención para a eliminación de todas as formas de discriminación contra a muller.

Constatamos que:

- A participación e representación das mulleres nos niveis máis elevados de responsabilidade e de toma de decisións, mantéñense en niveis moi baixos en todos os campos, pero particularmente no ámbito económico, financeiro e político.
- O aumento do nivel formativo das mulleres no se ten correspondido cunha presenza proporcional nos espazos de toma de decisións, incluídos os postos directivos das grandes empresas e aqueles nos que se xera novo coñecemento.
- Este déficit de representación supón unha perda do talento das mulleres para a sociedade, sobre todo no actual contexto de superación da crise económica e financeira.
- As xeracións máis xoves están reproducindo comportamentos sexistas nos diferentes ámbitos da vida, como mostran os datos sobre violencia de xénero, sobre a discriminación no acceso e promoción profesional, ou sobre a discriminación nas retribucións e a protección social.
- Ante o reto demográfico que representa o envellecemento progresivo da poboación europea, as responsabilidades do coidado seguen estando xeralmente en mans das mulleres.
- Os estereotipos sexistas seguen determinando un comportamento diferenciado de mulleres e homes, e favorecendo situacións de discriminación. Os medios de comunicación xogan un papel decisivo nesta materia.
- A pesar dos progresos en igualdade de xénero, é necesario continuar avanzando para conseguir unha igualdade real para todas as mulleres e homes.
- A celebración de cumios coma estes son un importante mecanismo para avanzar en igualdade.

Declaramos que:

- A calidade das nosas democracias require unha participación equilibrada de mulleres e homes nos espazos de representatividade e en todos os ámbitos e niveis de toma de decisións.
- A violencia contra as mulleres é unha violación dos dereitos humanos e impide o seu pleno desenvolvemento persoal e profesional.
- A participación equilibrada de mulleres e homes é un elemento indispensable para consolidar modelos democráticos inclusivos apoiados na innovación, na solidariedade e na sostibilidade.
- O acceso de máis mulleres a postos de decisión política favorece a incorporación da igualdade en todas as accións dos gobernos.
- O acceso de máis mulleres a postos de decisión económica contribúe a promover a igualdade de xénero.
- A igualdade entre mulleres e homes non é só unha cuestión de dereitos fundamentais e de xustiza social, senón que é tamén unha condición previa para lograr os obxectivos en materia de crecemento sostible, emprego, competitividade, excelencia científica e cohesión social.

- *A rendabilidade das políticas de igualdade entre mulleres e homes maniféstase en maiores taxas de emprego, máis contribución ao PIB, maiores ingresos fiscais, uns índices de natalidade sostíbles e maior cohesión social.*
- *A discriminación en función do sexo é estrutural e esixe en consecuencia cambios estruturais e culturais en todas as ordes da vida.*
- *A igualdade entre mulleres e homes, como ten demostrado a experiencia, é unha resposta sostíble para os retos de futuro, especialmente aqueles que hai que encarar na próxima década.*

Por todo elo, o grupo municipal socialista presenta a Declaración de Cádiz, subscrita por ministras e líderes políticas dos estados membros da unión europea o día 5 de febreiro de 2010, como moción institucional para que o pleno do concello de Ames, como órgano supremo da vontade municipal democraticamente establecida pola elección popular de todos os membros, acorde e se comprometa a:

- *Traballar para asegurar unha participación equilibrada de mulleres e homes en todos os espazos de responsabilidade.*
- *Traballar para que os gobernos e as institucións promovan a corresponsabilidade de mulleres e homes no ámbito doméstico e dos coidados, contribuíndo así a facilitar o acceso igualitario de mulleres e homes aos postos de responsabilidade e de toma de decisións.*
- *Traballar para que a igualdade de xénero sexa unha prioridade nas axendas políticas e a intensificar os nosos esforzos para identificar e abordar os obstáculos que dificultan, impiden ou limitan a participación das mulleres nos ámbitos de responsabilidade, en particular de decisión política e económica e de xeración de coñecemento.*
- *Impulsar nos nosos gobernos e institucións a consideración de posibles cambios normativos, que incorporen a transversalidade de xénero, medidas de acción positiva, alcores e metas que promovan unha participación máis equilibrada das mulleres e os homes nos ámbitos políticos, públicos e económicos.*
- *Traballar para incorporar a dimensión de xénero nas respostas fronte á crise económica, financeira e de emprego, tendo en conta o distinto impacto que esta ten en mulleres e homes e para que elo se reflicta na próxima Estratexia 2020.*
- *Poñer ao servizo da sociedade a nosa posición estratéxica e a nosa experiencia para eliminar e prever todo tipo de discriminacións.*
- *Apoiar a futura entidade de xénero de Nacións Unidas para avanzar na capacitación das mulleres de todo o mundo e respaldar a aquelas que se enfrontan con maiores dificultades.*

Facemos un chamamento aos gobernos e ás institucións, aos axentes sociais e económicos, aos medios de comunicación, ás institucións académicas e científicas e a todos os homes e mulleres, para que removan os obstáculos que impiden a plena participación das mulleres en todos os ámbitos da sociedade e o seu acceso e permanencia nos postos de toma de decisións, contribuíndo así a sociedades máis xustas, máis iguais, máis inclusivas e eficientes.

Punto Noveno.- Rogos e preguntas.

Rogos.

Primeiro rogo.-

Intervén o voceiro do grupo municipal socialista don **Francisco Villaverde Marcos** para formular o seguinte rogo: Debido á actual situación derivada da folga dos traballadores da piscina municipal, quero formular o seguinte rogo, a cuxas motivacións dou lectura:

O pasado 1 de febreiro, os traballadores/as de instalacións deportivas públicas concesionadas iniciaron unha folga indefinida para reclamar melloras nas súas condicións laborais.

A resolución do conflito, moi enquistado tras case un mes de folga no sector, pasaría porque as posturas das dúas partes superen a fase de estancamento na que se atopan e sexa posible atopar puntos de encontro.

O Presidente da Federación Galega de Municipios e Provincias, en representación dos alcaldes de Galicia, fixo o pasado 3 de febreiro un chamamento respecto da folga e das reclamacións dos traballadores/as das instalacións e centros deportivos, avogando pola mediación arbitral para desbloquear a negociación dos traballadores de centros deportivos.

Considérase precisa a intervención do Consello Galego de Relacións Laborais ou da Consellería de Traballo, segundo proceda, para rematar co conflito e normalizar o uso das instalacións municipais.

A Federación Galega de Municipios e Provincias encargou un estudo aos servizos xurídicos da federación para a procura dunha mediación eficaz que logre desbloquear o conflito laboral entre os traballadores/as dos centros deportivos e as empresas concesionarias das instalacións.

Os traballadores/as das instalacións e centros deportivos reclaman a firma dun convenio marco de ámbito galego que regule as súas condicións de traballo, ata o de agora suxeitas a un acordo estatal de mínimos, que, segundo os asalariados, condénaos á precariedade.

O estancamento das negociacións coa patronal de concesionarias, derivou en paros intermitentes do servizo, co conseguinte peche das instalacións e logo nunha folga indefinida que se acompaña de accións reivindicativas como a escenificación dun asalto a unha sucursal bancaria ou a entrada nas dependencias de distintos concellos e Institucións galegas.

A falla de avances na longa negociación entre a patronal e os traballadores/as deste sector, está a provocar unha alteración do servizo que impide aos usuarios/as a práctica normal das súas actividades deportivas. A situación está a acadar tal magnitude que os concellos senten a obriga de mediar no conflito.

Unha mediación aceptada polas partes a cargo da Dirección Xeral de Relacións Laborais ou do Consello Galego de Relacións Laborais podería encamiñar este problema cara unha solución que satisfaga a patronal e traballadores.

O Grupo Municipal Socialista roga o respaldo do concello de Ames á postura manifestada e anunciada pola Federación Galega de Municipios e Provincias para unha mediación, aceptada polas partes, a cargo da Dirección Xeral de Relacións Laborais ou do Consello Galego de Relacións Laborais, a cal podería encamiñar este problema cara unha solución que satisfaga a patronal e traballadores/as e que desbloquee definitivamente este conflito que de non ser así podería prexudicar a todos os usuarios e neste caso aos veciños de Ames.

Toma a palabra o señor alcalde don **Carlos Antonio Fernández Castro** que da as grazas por este rogo manifestando que a Alcaldía e o grupo municipal socialista van respaldar a iniciativa do presidente da Fegamp.

E non habendo mais asuntos de que tratar o señor alcalde levantou a sesión ás vintedúas horas e corenta e cinco minutos de todo o que eu como secretaria certifico.

Vº Prace

A secretaria

O alcalde,